

四庫全書

子部

欽定四庫全書

御定淵鑑類函卷三百九十九

果部

李

桃

李一

原許氏說文曰李果也從木子聲杼古文李 爾雅曰

休無實李

郭璞注曰一名趙李

座接慮李

今之麥熟李

駁赤李桃李醜

核棗李曰寔之

孫炎曰桃李類皆核寔之去抵也寔音帝

郭義恭廣志曰

車下李車上李

又曰麥李細小有溝道有黃建李青

皮李馬肝李赤李房陵李 增又曰鼠李朱李可以梁

又曰細小饅

音亦

李肌粘茹似饅有柰李離核李李似

柰有辟李熟必先劈裂有孝經李一名老子李其樹數  
年則枯有杏李味小酢似杏有夏李冬李十一月熟

格物總論曰李實數種或朱或黃或綠或紫或斑點大  
者如杯小者如雞卵核小味甘脆皆果中之珍也 原

毛詩曰何彼穠矣華如桃李 又曰投我以木李報之

以瓊玖 又曰丘中有李彼留之子 又曰北山有李

又曰投我以桃報之以李 禮記曰食棗桃李弗致

於核

注曰為恭敬也

春秋運斗樞曰玉衡星散為李 增漢

武內傳曰仙家上藥有負丘紅李 原陸翹鄴中記曰

華林園有春李冬華春熟 增韋述兩京記曰東都嘉

慶坊有李樹其實甘鮮為京都之美故稱嘉慶李今人  
但言嘉慶子蓋稱謂既熟不加李亦可記也 唐志曰

北之渤海有九都之李 原荊州記曰房陵有好李

風土記曰南郡有細李有青皮李 增管子曰五沃之

土其木宜李 原列子曰師門嘯父弟子食桃李葩

鹽鐵論曰桃李實多者來歲謂之穰 洞冥記曰琳國

去長安九萬里生玉葉李色如碧玉數十歲一熟味酸  
昔韓衆嘗餌此李因名韓衆李 增述異記曰瀨鄉老

子祠有紅縹李一李二色 又曰房陵定山有朱仲者

家有縹李代所希有 又曰晉暉章殿前有嘉李 又

曰李戎州所出肉熟而皮猶綠 雜考曰江南建寧有

一種名均亭李紫色極肥大味甘如蜜南方之李此實

為最 真人王褒內傳曰五雲丹山上有玄雲李食之  
得仙 原本草曰李根治癰服其花令人好顏色凡李  
實熟食之皆好除固熱調中食之不可合雀肉食之不  
可臨水上噉之李皮水煎含之治齒痛 增陶弼詩曰  
主人肝膽無猜忌李下遊人任整冠

李二

增集真記曰西王母居龍目城城中產黃中李花閱則  
三影結實則九影花實上皆有黃中二字王母惜之過

於蟠桃與紫陽真官博戲則以一二百枚遞分勝負

黃帝內傳曰王母遺帝上清玉文之李 原神仙傳曰

老子母適到李樹之下生老子而能言指李樹曰以此  
樹為我姓 孟子匡章曰陳仲子豈不誠廉士哉居於

陵三日不食耳無聞目無見也井上有李蟮食實者過  
半矣匍匐往將食之三咽然後耳有聞目有見 西京

雜記曰漢武初修上林苑羣臣遠方各獻其果樹有合  
枝李朱李黃李紫李綠李青李綺李青房李顏回李羌

李燕李猴李沈朱李浮素李 漢武內傳曰李少君謂

武帝曰溟海棗大如瓜鍾山之李大如餅臣食之遂生

奇光 抱朴子曰五原蔡誕入山而還欺其家人云到

崑崙山有玉李形如世間者但光明洞徹而堅以玉井

水洗之便軟而可食 東方朔占曰朔與弟子俱行朔

渴令弟子叩道邊家門不知室中姓名呼不應朔復往

見博勞飛集其家李樹上朔謂弟子曰主人當姓李名

博勞汝呼當應室中人果有姓李名博勞出與朔相見



即入取飲與之 增述異記曰水精李出天台閑閑真

人曾致元帝 東方朔占曰魏文帝安陽殿前天降朱

李八枚噉一枚可數日不食 原世說曰王戎年七歲

嘗與諸小兒遊路道邊李樹有子折枝諸小兒競走取

之惟戎不動人問之荅曰樹在道邊而多子此必苦李

也取之信然 又曰王安豐有好李賣之恐人得種常

鑽其核 增晉書曰和嶠性至儉家有好李常求之不

過數十王武子因其上直率將少年能食之人將斧詣

園飽噉之伐之送與嶠問何如君李 嵇康高士傳曰  
長靈安丘生病篤弟子公沙都來省之與安共至於庭  
樹下聞李香開目見雙赤李著枯枝都仰手承李自隨  
掌中安丘食之所苦盡愈 齊書曰王僧孺少時有餽  
其父李先以一與之不受曰大人未見不容先嘗 花  
木錄曰北齊武帝改芳林園為仙都苑植名果有合歡  
杏同心李 唐書曰武德中有獻李樹連理盤屈如龍  
又曰貞觀中玉華宮李樹連理隔澗合枝 天寶遺

事曰處士崔元微東洛有宅入嵩山采朮芝回宅中蒿  
萊滿院時春季夜風月清爽忽有白衣引綠裳者曰姓  
李一曰陶氏乃命坐月下色皆殊絕滿座芳香襲人

承平舊纂曰蕭瑀陳叔達於龍昌寺看李花相與論李  
有九標謂香雅細澹潔密宜月夜宜綠鬢宜白酒 又

曰神龍中陳州官舍有李樹花將盡忽更鮮茂而生花  
焉 唐新語曰安金藏喪母廬於墓側有湧泉自出又  
有李樹盛冬開花犬鹿相狎采訪使盧慎以聞詔旌其

門閭 國史補曰李直方嘗第果實名如貢士者以綠  
李為首楞梨為副櫻桃為三甘子為四葡萄為五或薦  
荔枝曰寄舉之首 宋高僧傳曰唐肅宗至德二年返  
轅詣扶風令釋元皎於鳳翔開元寺置御藥師場忽於  
法會内生一叢李樹有四十九莖元皎等表賀帝喜曰  
此大瑞應荅敕云瑞李繁滋國之興兆生在伽藍之內  
足知覺樹之榮感此殊祥與師同慶 舊唐書曰興元  
元年八月亳州貞元縣大空寺僧院李樹種十四年纔

長一丈八尺今春枝忽上聳高六尺周圍似蓋九尺餘  
樞要錄曰沆陵伍貫卿家李花最盛一日夜奴婢遙  
見花作數團如飛仙狀上天去花上露水倏作雨數千  
點花則下矣見錦繡萬花谷後集安慶府志曰正德十四年己  
卯三月李結實如瓜其味甜其長寸四月大水免其租  
半

李三

原翠質 青皮

上見傅休奕李賦下詳類聚

采春山

沈寒水

山海

經曰邊春之山多李里  
人常采之

下詳類聚

南居先熟

東苑已朱

周處風土

記曰南居細李四月先熟  
名李

張華真人篇曰朱李生東苑甘瓜出西郊

荊州記曰房陵南居有

廬山白

房陵縹

魏文帝列異傳曰袁本初時有神出河東號度索君人立廟兗州蘇氏母

病往禱見二人著白布單衣高冠冠似魚頭謂度索君  
曰昔廬山共食白李未久已三千年日月易得使人悵  
然去後度索君曰此南海君也

下見傳李賦

增龍血

鼠精

琴莊異事曰崔奉國家一

種李肉厚而無核識者曰天罰乖龍必割其耳耳血墮  
地故生此李

好事集曰王侍中家堂前有鼠從地出

其穴即生李樹花實  
俱好此鼠精李也

作會

無蹊

說林曰立夏日俗尚噉李時人語曰

立夏得含李能令顏色美故是日婦人作李會取李汁  
和酒飲之謂之駐色酒一曰是日噉李令不瘦夏唐

書李入典選請謁不行  
時人語曰李下無蹊徑

愈目

如拳

抱朴子曰南頓人張助耕於田

因有一李栽在耕次助意惜之欲持歸乃掘取之未得  
即去以濕土封其根置空桑中遂忘取後作遠職不在  
其里中人見桑中忽生李謂之神有病目痛者蔭息此  
桑下因祝之言李君能令我目愈當謝一豚其目偶愈  
便殺豚祭之傳者過差便言此樹能令盲者得視  
速近翕然皆來請福 李尤果賦曰如拳之李 沈

朱

薦碧

謝玄暉詩曰夏李沈朱實  
韓愈詩曰冰盤夏薦碧實脆

思戒

防嫌

瑣言曰明宗不豫馮道入問曰寢膳之間尤宜調謹因  
指御前果實曰如食桃不康他日見李思戒 古樂府  
歌曰君子防未然不處嫌疑  
間瓜田不納履李下不整冠 同詠 獨明 高隱外書  
曰元微之

白樂天兩不相下一日同詠李花微之先成華綃之句  
樂天乃服蓋華綃白而輕一時所尚 誠齋詩序曰桃

李歲歲同時並開而退之有花不見桃惟見李之句殊  
不可解因晚登碧落堂望隔江桃李桃皆暗而李獨明  
乃悟其妙

### 李四

原得蔭得實

說苑曰夫春樹桃李夏得蔭其下秋得食其實

整冠

詳前李三

增

盤根

杜甫詩曰仙李盤根大

三十六園

李尤果賦曰三十六園之朱李蓋仙李縹而神

李紅

### 李五

原詩古歌詞曰桃生露井上李生桃樹傍蟲來齧桃根



李樹代桃僵樹木身相代骨月還相忘 梁沈約詠麥

李詩曰青玉冠西海碧石彌外區化為中國實其下成  
路衢在昔良足貴因小邈難逾色潤房陵縹味奪寒水  
朱摘持歌以獻尚食且踟躕 梁王約荅元金紫餉朱  
李詩曰穠華春發彩結實下成蹊潘生詠金谷魏后沈  
寒谿逢君重妖麗移翫入崇閨慙無瓊玖報徒用瘁幽  
棲 陳江總詠李詩曰嘉樹春風早春風花落新但得  
成蹊處幾得正冠人當知露井側復與天桃鄰 唐太

宗賦得李詩曰玉衡流桂圃成蹊正可尋鶯啼密葉外  
蝶戲脆花心麗景光朝彩輕煙散夕陰暫顧暉章側還  
眺靈山林 又探得李詩曰盤根植瀛渚交幹橫倚天  
舒華光四海卷葉蔭三川 增唐李嶠詠李詩曰潘岳  
閒居日王戎獻酒辰蝶遊芳徑馥鶯嚙弱枝新葉暗青  
房晚花明玉井春方知有靈幹特用表真人 賀知章

望人家桃李花詩曰山源夜雨度仙家朝發東園桃李  
花桃花紅兮李花白照灼城隅復南陌南陌青樓十二

重春風桃李為誰容棄置千金輕不顧踟躕五馬謝相逢  
徒言南國容華晚遂歎西家飄落遠的皪長奉明光殿  
氤氲半入披香苑苑中珍木原自奇黃金作葉白銀枝  
千年萬歲不凋落還將桃李更相宜桃李從來露井傍  
成蹊結彩矜豔陽莫道春花不可樹會持仙實薦君王  
韓愈詠李花詩曰平旦入西園梨花數株若矜夸傍有  
一株李顏色慘慘似含嗟問之不肯道所以獨繞百匝至  
日斜忽憶前時經此樹正見芳意初萌芽奈何

趁酒不省錄不見玉枝攢霜葩泣然為汝下雨淚無由  
返旆羲和車東風來吹不改顏蒼茫夜氣生相遮冰盤  
夏薦碧實脆斥去不御慙其花當春天地爭奢華洛陽  
園苑尤紛拏誰堆平地萬堆雪剪刻作此連天花日光  
赤色照未好明月暫入都交加夜領張徹投盧仝乘雲  
共至玉皇家長姬香御四羅列縞裙練悅無等差靜濯  
明妝有所奉顧我未肯置齒牙清寒瑩骨肝膽醒一生  
思慮無由邪 宋司馬光詠李詩曰嘉李繁相倚園林

澹泊春齊紈翦衣薄吳紵下機新色與晴光亂香和露  
氣勻望中皆玉樹環堵不為貧

原賦晉傅休奕李賦曰值中州之名果兮結修根於芳  
園嘉列樹之蔚蔚兮美弱枝之爰爰既乃長條四布密  
葉重陰夕景迴光傍蔭蘭林於是肅肅晨風飄飄落英  
潛實內結豐彩外盈翠質朱變形隨運成清角奏而微  
酸起大宮動而和甘生既變洽熟五色有章種別類分  
或朱或黃甘酸得適美逾蜜房浮彩點駁赤者如丹人

口流濺逸味難原見之則心悅含之則神安乃有河沂  
黃建房陵縹青一樹三色異味殊名乃上代之所不覩  
兮咸升御乎紫庭周萬國之口實兮充薦享於神靈昔  
怪古人之感貺乃荅之以寶瓊玩斯味之奇瑋兮然後  
知報之為輕

桃一

原毛詩曰何彼穠矣華如桃李平王之孫齊侯之子  
又曰桃之夭夭灼灼其華桃之夭夭其葉蓁蓁 又曰

投我以木桃報之以瓊瑤 又曰園有桃其實之穀

禮記曰仲春之月桃始華 爾雅曰桃李醜核桃曰膽

之

膽擇取其美者

易通卦驗驚蟄曰大壯初九桃不花倉庫

多火 春秋運斗樞曰玉衡星散為桃 太清諸卉木

方曰酒漬桃花而飲之除百病好容色 增管子曰五

沃之土其果宜桃 格物總論曰桃實大者如小兒拳

小者如雞卵夏五六月方熟味甘香不酸澀亦果中之

珍也 六帖曰波斯國出偏桃其國呼為婆澹樹長五

六丈圍四五尺葉似桃闊大三月開花花落結實狀如

桃子而形偏故謂偏桃肉苦核甜西域諸國並珍之

原元中記曰木子之大者有積石山之桃實焉大如十

斛籠抱朴子曰桃膠以桑木灰漬服之百病愈久服

身有光在晦夜之地如月出也多服之則可以斷穀矣

本草曰梟桃在樹不落殺百鬼玉桃服之長生不老

增又曰桃實已乾著木上經冬不落者名桃奴正月

采之夢書曰桃為守禦辟不祥夢見桃者守禦宮



原典術曰桃者五木之精也故壓伏邪氣制百鬼故今人作桃符著門上壓邪氣此仙木也 山海經曰桃樹屈蟠三千里 歲時記曰桃者五行之精壓伏邪氣制百怪

桃二

增金城歲節錄曰洛陽人家寒食食桃花粥 原韓詩外傳曰孔子侍坐於魯哀公哀公賜之桃與黍仲尼先飯黍而後噉桃哀公曰黍以雪桃也對曰丘知之矣夫

黍五穀之長而桃為下君子以賤雪貴不聞以貴雪賤也  
晏子曰公孫捷田開疆古冶子事景公勇而無禮  
晏子言於公餽之二桃曰三子計功而食桃公孫曰我  
再搏乳虎功可以食田曰我杖兵而御三軍者再功可  
以食古冶子曰我嘗濟河鼃銜左驂治潛行水底逆流  
百步順流九里得鼃頭功可以食二子曰我勇不若子  
功不逮子取桃不讓是貪也然而不死無勇也刎頸而  
死冶曰二子死冶子獨不逮又刎頸而死尹喜內傳

曰老子西遊省太真王母共食碧桃紫梨。韓子曰昔者彌子瑕有寵於衛君與君遊於果園食桃而甘以其半噉君君曰忘其口而食我及彌子瑕色衰愛弛得罪於君君曰是故嘗噉我以餘桃。新序曰魏文侯見箕季從者食其桃箕季禁之文侯曰箕季豈愛桃哉是教我下無犯上也。鍾離意別傳曰秦吏以私恨告民吳旦生盜食宗廟御桃旦生對曰民不敢食也王曰剖其腹出其桃史記惡而書之曰食桃之肉當有遺核王不

知此而剖人腹以求桃非禮也 漢書曰惠帝五年十

月桃李花 增文帝六年十月桃李華 原漢武故事

曰東郡獻短人呼東方朔朔至短人因指朔謂上曰西

王母種桃三千歲為此子兒不良也已三過偷之矣後

西王母下出桃七枚母因噉二以五枚與帝帝留核著

前母問曰用此何上曰此桃美欲種之母笑曰此桃三

千年一著子非下土所植也 又曰漢武初修上林苑

羣臣遠方各獻名果有緗核紫文桃霜桃

霜下可食

金城桃

西京雜記曰漢明帝時常山獻巨桃核其桃霜下花  
至暑方熟使植園林 神仙傳曰張陵沛人也弟子趙  
升就陵受學陵以七事試之第七試者陵與諸弟子登  
雲臺山絕巖上有一桃樹旁生石壁下臨不測去三四  
丈有桃大實陵謂諸弟子曰得此桃者當告以道要弟  
子皆流汗無敢視者升曰神人所護何險之有乃從上  
自擲正投桃樹上取桃滿懷而石壁峻峭不能得還乃  
擲桃二百二枚陵分桃賜諸弟子餘二枚陵自食一留

一以待升陵乃伸手引升升忽已還乃以向一桃與升

晉起居注曰咸和六年寧州上言甘露降城北園林

桃李等樹 鄴中記曰石虎苑中有勾鼻桃重二斤半

晉宮闕名曰華林園桃七百三十八株白桃三株侯

桃三株 鄧德明南康記曰南康玉山有石桃故老云

古有寒桃生於嶺巔隱淪之士將大取其實因變成石

增海錄曰洋州雲亭山生獼猴桃甚甘酸食之止渴

鄭緝之東陽記曰龍丘山有一巖外如窗牖內有石

童巖前一桃樹其實甚甘 裴淵廣州記曰廬山頂上

有山桃人時登采拾只得於上飽噉不得持下下輒迷

不能返 原國策曰孟嘗君將入秦蘇秦往見之孟嘗

曰人事者我已知之所未聞者獨鬼事耳秦曰臣之來

固以鬼事見君矣臣來過淄上有土偶人焉與桃梗相

與語桃梗謂土偶人曰子西岸之土也埏子以為人至

歲八月降雨下淄水至則子殘矣曰不然我西岸之土

殘則復西岸耳子東國之桃梗也刻削子以為人降雨

下溜水至流子而去則子漂漂者將何如矣今秦四塞之國譬如虎口而君入之則臣不知君所如矣孟嘗乃止 增金樓子曰東南有桃都山山有樹樹上有雞日

初出照此桃天雞即鳴天下之雞感之而鳴樹下有兩

鬼對持葦索取不祥之鬼食之今人正朝作兩桃人法

乎此也

鬼一名神荼一名鬱壘見事詞類彙集

原十洲記曰東海有山

名度索山有大桃樹屈盤數千里曰蟠桃 增神農經

曰玉桃服之長生不死若不得早服之臨死日服之其



尸畢天地不朽 神異經曰東北有樹焉高五十丈其  
葉長八尺廣四五尺名曰桃其子徑三尺二寸小核食  
之令人壽核中仁可以治嗽 原拾遺記曰鰲塘山去  
扶桑五萬里日所不及地寒則桃樹千圍其花青黑色  
萬歲一實 增又曰景陽山百果園有仙人桃其色赤  
表裏照澈得霜乃熟 酉陽雜俎曰安期生以醉墨灑  
石上皆成桃花 又曰洛城華林園內有冬桃十月始  
熟形如栝萐食之解勞一名王母桃 又曰占畢國出

偏核桃形如半月狀波斯人取食之絕香美極下氣力  
比於中夏桃仁療疾不殊會叢云偏桃仁勃律國尤多  
花殷紅色郎中解忠順使安西以蘿蔔揷之而生桃仁  
肥大其桃皮不可食 青州雜記曰桃花有一種垂絲  
至一二尺者采之鍊以松脂纏織成履甚輕 老學菴  
筆記曰歐陽公梅宛陵王文恭集皆有小桃詩歐詩云  
雪裏花開人未知摘來相顧共驚疑便當索酒花前醉  
初見今年第一枝但謂桃花有一種早開者耳及遊成

都始識所謂小桃者上元前後即著花狀如垂絲海棠

曾子固雜識云正月二十間天章閣賞小桃正謂此也

風俗通曰黃帝書稱上古之時有兄弟二人神荼與鬱律度索山上桃樹下簡百鬼妄禍人則縛以葦索執以食虎於是縣官以臘除夕飾桃人垂葦索畫虎於門效前事也 增西京雜記曰漢永平中劉晨阮肇共入天台迷不得返糧盡山上數桃噉之遂不飢下山見溪邊有二女因邀還家諭婢云劉阮二郎雖向得瓊實今

尚虛弊可速作食 原神仙傳曰樊夫人與劉剛俱有

道術各自言勝中庭有大桃樹夫妻各咒其一桃便鬪  
相擊良久剛所咒樹走出籬外 又曰高丘公服餌桃

膠得仙 增本事詩集曰劉公幹居鄴下一日桃李爛

熳值諸公子延賞久之方去公幹問僕曰損花乎僕曰  
無但愛賞而已公幹曰珍重輕薄子不損折使老子酒  
興不空也遂飲花下作放歌行 原甄異傳曰譙郡夏  
侯文規亡後見形還家經庭前桃樹邊過曰此桃我昔

所種子乃美好其婦曰人言亡者畏桃君何不畏耶荅曰桃東南枝長二尺八寸向日者憎之或亦不良也

世說曰桓玄素輕桓崖桓崖在京京下有桃元連就求遂不辦得佳者玄與殷仲文書以為嗤笑曰德之休明肅慎貢楛矢如其不爾籬壁間物亦不可得 陶潛

桃花源記曰晉太康中武陵人捕魚從谿而行忽逢桃花林夾兩岸數百步無雜木芳草鮮美落英繽紛漁人異之前行窮林林盡見山山有小口髣髴有光便舍船

步入初極狹行四五十步豁然開朗邑室連接雞犬相

聞男女被髮怡然自樂見漁人大驚問所從來要還為

設酒食云先世避秦亂率妻子來此遂與外隔絕不知

有漢無論晉魏也既出白太守太守遣人隨而尋之迷

不復得路 妬女記曰武歷陽女嫁阮宣武絕忌家有

一桃樹花葉灼耀宣歎美之即便大怒使婢取刀斫樹

摧折其華 增虞世南史畧曰北齊盧士深妻崔林義

之女有才學春日以桃花和雪與兒饋面咒曰取紅花

取白雪與兒洗面作光悅取白雪取紅花與兒洗面作  
妍華取花紅取雪白與兒洗面作光澤取雪白取花紅  
與兒洗面作華容 杜寶大業拾遺錄記曰四年五月  
帝將北巡發自東郡江東送白葉桃樹四株勅付西園  
種之其花似蓮花而小花有十餘重重有七八葉大於  
尋常桃花 唐書曰康園貞觀十一年獻金桃銀桃詔  
令植之於苑囿 通典曰貞觀二十一年康園獻黃桃  
大如鵝卵其色如金亦呼為金桃 景龍文館記曰四

年春上宴於桃花園羣臣畢從學士李嶠等各獻桃花詩上令宮女歌之辭既清婉歌仍妙絕獻詩者舞蹈稱萬歲上勅太常簡二十篇入樂府號曰桃花行 北戶

錄曰桑苧翁謂李復云天寶末有韋長史虛舟寓於廬山瀑布泉時夏月多雨見瀑布之中流出一桃葉闊五寸長一尺二寸 又曰至德初徐正字凝於海鹽縣白塔沙渚之上得一桃核片可貯一升 又曰水部貲外郎杜陟嘗見江淮士人以桃核扇量米正容一升言於



九疑山溪中得 麗情集曰崔護清明日獨遊都城南  
見莊居桃花繞宅叩門求漿有女子開門以盃水飲護  
回目注視屬意甚殷來歲清明護復往則門已扃鎖因  
題其上曰去年今日此門中人面桃花相映紅人面祇  
今何處去桃花依舊笑春風後日復往聞哭聲一老父  
曰子非崔護耶我女見此題詩絕食而卒崔亦感動詣  
殯所大呼曰護在此女遂復生 塵史曰劉禹錫為主  
客郎遊玄都觀舊無桃花貞元末至京師則有道士植

仙桃滿觀花如紅霞劉賦詩曰紫陌紅塵拂面來無人  
不道看花回玄都觀裏桃千樹盡是劉郎去後栽太和  
初劉重遊玄都觀已蕩然無一株惟兔葵燕麥動搖春  
風再題詩曰百畝庭中半是苔桃花盡淨菜花開種桃  
道士歸何處前度劉郎今又來 集仙錄曰金母降謝

自然家將桃一枚懸臂上有三十顆碧色大如椀云此  
猶是小者 又曰術士王瓊妙於化物無所不能方冬  
以藥栽培桃杏數株一夕繁英盡發芳葉濃豔月餘方

謝 又曰茅山乾元觀姜麻子閭蓬頭弟子也從揚州  
乞爛桃核數石空山月明中種之不避豺虎自茶庵至  
觀中有桃花五里餘 花史曰范文正公女孫病狂嘗  
閉一室窗外有大樹一株花適盛開一夕斷櫺登木食  
桃花幾盡自是遂愈 又曰石曼卿通判海州以山嶺  
高峻人路不通略無花卉點綴照映使人以泥裹桃核  
拋擲於山頂上一二歲間花發滿山爛如錦繡

桃三

原穠華

甘實

上見桃一  
見傅玄桃賦

下

宜五沃

已三偷

上詳

桃一 下

紫文

青色

上見桃二  
漢武內傳曰西  
王母以七月七日降帝宮命

侍女索桃須臾以玉盤盛桃七枚如雞卵形圖  
色青以呈王母王母以五枚與帝自食二枚

青花

紅萼

上見桃二  
謝靈運詩曰  
山桃發紅萼野蕨漸紫苞

緗核

綬花

上見桃二

應劭漢官儀曰二千  
石綬青地桃花縹三彩

生玉嶺

植霜園

上見桃二  
王子年

拾遺記曰漢明帝常山獻巨核  
桃帝使植於霜林園謂相陵誤

武陵源

洛陽路

上見

桃二 宋子侯董嬌嬈詩曰洛陽城東路桃李生路傍  
花花自相對葉葉自相當春風南北起花葉自低昂

增銷恨

助嬌

開元遺事曰明皇於禁苑中有千葉  
桃花盛開帝與貴妃日夕宴花樹下

帝曰不獨萱草忘憂此花亦能銷恨  
苑有千葉桃帝親折一枝插於妃子寶冠上曰此花尤

能助

紅霞

錦浪

上見桃二

李白詩

偏核雙

嬌態

岸夾桃花錦浪生

仁

上見桃二

東坡詩

絡絲白

過雁紅

海錄碎事曰用柿子

樹接桃枝早熟者謂之絡絲白晚熟者謂之過雁紅

# 桃四

原放牛

尚書曰武王克商放牛于桃林之野

增夏食

周禮曰夏食鬱律桃李杏梅

原饋籩食

周禮曰饋食之籩具實棗栗桃

成蹊

史記曰桃李不言自成蹊

宜

將相門

隋書曰崔頤荅豫章王書云門有將相宜樹桃李

樹苦桃

離騷曰斬伐橘柚列

樹苦桃

增豔陽

文選曰豔陽桃李節

露井

古詩曰桃生露井上

紅嫩

杜甫

詩紅入桃花嫩

原插戶

莊子曰插桃枝於戶運反其下童子入而不畏而鬼畏之是鬼智不如童

子也

舊祭一時

孫卿子曰桃李舊祭於一時時至乃殺

亦足以豪

列仙傳曰

得綏山一桃雖不能仙亦足以豪

令雞鳴

淮南萬畢術曰孤桃枝之令雞鳴取孤桃南北

行枝長三尺折以為券塗以三歲雄雞血夜居樓下則鳴

桃五

原詩梁簡文帝詠初桃詩曰初桃麗新采照地吐其芳

枝間留紫燕葉裏發輕香飛花入露井交幹拂華堂若

映窗前柳懸疑紅粉妝 任昉詠池邊桃詩曰已謝西

王苑復揖綏山枝聊逢賞者愛棲趾傍蓮池開紅春灼

灼結實夏離離 隋蕭慤奉和詠龍門桃花詩曰舊聞

開露井今見植龍門樹少知非塞花高異少原論時應

未發故欲影歸軒祇言輕摘罷猶勝逐風翻 孔紹安

應詔詠夭桃詩曰結葉還臨影飛香欲徧空不意餘花

落翻沈露井中 唐太宗詠桃詩曰禁苑春暉麗花蹊

綺樹裝綴條深淺色點露參差光向日分千笑迎風共

一香如何仙嶺側獨秀隱遙芳 增李嶠詠桃詩曰獨

有成蹊處穠華發井傍山風迎笑臉朝露泣啼妝隱士  
顏應改仙人路漸長還欣上林苑千歲奉君王 又侍

宴桃花園詠桃花應制詩曰歲去無言忽顚顚時來含

笑吐氛氲不能擁路迷仙客故欲開蹊待聖君 杜甫

覓桃栽詩曰奉乞桃栽一百根春前為送浣花邨河陽

縣裏雖無數濯錦江邊未滿園 韋處厚桃塢詩曰噴

日舒紅景通蹊茂綠陰終期王母摘不羨武陵深 李



白桃花詩曰桃花開東國含笑誇白日偶蒙東風榮生  
此豔陽質豈無佳人色但恐花不實宛轉龍火飛零落  
早相失詎知南山松獨立自蕭瑟 王昌齡詩曰桃花  
四面發桃葉一枝開欲暮黃鸝轉傷心玉鏡臺清箏向  
明月半夜春風來 王維桃花源行曰漁舟逐水愛山  
春兩岸桃花夾去津坐看紅樹不知遠行盡清溪忽見  
人山口潛行始隈隩山開曠望旋平陸遙看一處攢雲  
樹近入千家散花竹樵客初傳漢姓名居人未改秦衣

服居人共住武陵源還從物外起田園月明松下房櫳  
靜日出雲中雞犬喧驚聞俗客爭來集競引還家問都  
邑平明閭巷掃花開薄暮漁樵垂水入初因避地去人  
間及至成仙遂不還峽裏誰知有人事世中遙望空雲  
山不疑靈境難聞見塵心未盡思鄉縣出洞無論隔山  
水辭家終擬長游衍自謂經過舊不迷安知峰壑今來  
變當時只記入山深青溪幾度到雲林春來偏是桃花  
水不辨仙源何處尋 溫庭筠數水小桃盛開詩曰數

水小橋東娟娟照露叢所嗟非勝地堪恨是春風二月  
豔陽節一枝惆悵紅定知留不住吹落亂塵中 唐彥

謙緋桃詩曰短牆荒圃四無隣烈火緋桃照地春坐久  
好風休掩袂夜來微雨已霑巾敢同俗態期青眼似有  
微詞動絳脣盡日更無鄉井念此時何必見秦人 韋

莊庭前桃詩曰曾向桃源爛熳遊也同漁父泛仙舟皆  
言洞裏千株好未勝庭前一樹幽帶露似垂湘女淚無  
言如伴息嬌愁五陵公子饒春恨莫引香風上酒樓

僧齊己桃花詩曰千枝含露態何處照人紅風暖仙源  
裏春和水國中流鶯應見落舞蝶未知空擲欲求圖畫  
枝枝帶竹叢 宋邵雍二色桃花詩曰施朱施粉色俱  
好傾國傾城豔不同疑是樂宮雙姊妹一時攜手嫁東  
風 蘇軾詩曰上苑夭桃自作行劉郎去後幾回芳厭  
從年少追新賞閒對宮花識舊香欲贈佳人非泛洧好  
紉幽佩與沈湘鶴林神女無消息為問何由返帝鄉  
又桃花詩曰爭開不待葉密綴欲無條傍沼人窺鑑驚

魚水濺橋 元楊載碧桃詩曰一枝如玉照芳春幾度

憑闌欲帶人翠被夜寒愁灑淚珠簾月冷怕傷神劉郎

陌上栽仍舊王母池邊賞又新不是梨花飄雪樹望中

清絕更無倫 鄭允端詠桃花詩曰紅雨春寒江上時

小桃欹樹出疎籬從教一簇開無主終不留題崔護詩

明楊基千葉桃花詩曰江花先好已先落二月芳菲

已蕭索披垣一樹獨開遲嫩葉龍蓂抱香萼朝來小雨

浥輕紅春色千重與萬重點注定知煩曉露翦裁曾不

費春工春來到處尋桃李不道東闌花自美傷心世事  
總如花何用勞勞行萬里又桃花詩曰深深翠竹映  
嬋娟湘女梳妝立曉煙流水落花成悵望舞裙歌袖是  
因緣也無人折休相妒纔有鶯啼更可憐却憶東闌碧  
千葉暖風香雨為誰妍

原賦晉傅休奕桃賦曰有東園之珍果兮承陰陽之靈  
和結柔根以列樹兮艷長畝而駢羅夏日先熟初進廟  
堂辛氏踐秋厥味益長花落實結與時剛柔既甘且脆

入口消流亦有冬桃冷伴冰霜和神適意恣口所嘗華  
升御於內庭兮飾佳人之令顏實充虛而療飢兮信功  
烈之難原嘉放牛於斯林兮悅萬國之乂安望海島而  
慷慨兮懷度索之靈山何茲樹之獨茂兮條枝紛而麗  
閨根龍蚪而雲結兮彌萬里而屈盤禦百鬼之妖慝兮  
列神荼以司奸辟凶邪而濟正兮豈惟榮美之足言  
宋伍緝之園桃賦曰嗟王母之奇果特華實兮兼副既  
陶煦以夏成又凌寒而冬就嗟異殖兮難拔亦晚枯兮

先茂農皇品其味漢帝驚其珍林休反耕之牛宅樹伺  
惡之神景斃勇於不足彌增罪於甘分雖無言兮成蹊  
巨充殽於魏君時令載始周南申章瞻擇有制藥齊惟  
良魯拂柩以悔荆楚供弧以事王 陳張正見衰桃賦

曰巖巖秀峰吐桂榮松獨夭桃之灼灼輕擢采於寒蹤  
爾乃萬株成錦千林似翼苔畫波文花然樹色發秦源  
而逸氣飄漢綬而流芳譬蘭缸之夜炷似明鏡之朝妝  
成蹊列徑光崖豔汜間真定之蒼黎雜房陵之縹李芬



芳難歇照耀無儔舒若霞光欲起散似電彩將收既而  
風落新枝霜飛故葉歎垂釣之妖童怨傾城之麗妾

增唐皮日休桃花賦曰伊祈氏之作春也有豔外之豔  
華中之華衆木不得融為桃花厥花伊何其實美多臺  
隸衆芳緣飾陽和開破嫩萼壓低柔柯其色則不澹不  
深若素練輕茜玉顏半酡若夫美景妍時春含曉滋密  
如不幹繁若無枝姝姝婉婉天天怡怡或俛者若想或  
閉者如癡或向者如步或倚者如疲或溫磨而可熏或

嫋嫋而莫持或幽柔而旁午或擗冶而倒披或翹矣如  
望或凝然若思或奕傑以作態或窈窕而騁姿日將明  
兮似喜天將慘兮若悲近榆錢兮妝翠靨映楊柳兮顰  
愁睂輕紅拖裳動則裊香宛若鄭袖初見楚王夜景皎  
潔闐然秀發又若嫦娥欲奔明月蝶散蠶寂當閨脈脈  
又若姐已未聞裂帛或開故楚豔豔春曙又若息嬌含  
情不語或臨金塘或交綺井又若西子浣紗見影玉露  
厭浥沃紅墮濕又若驪姬將譖而泣或在水濱或臨江

浦又若神女見鄭交甫或臨廣筵或當高會又若韓娥  
將歌斂態微動輕風婆娑煖紅又若飛燕舞於掌中半  
霑斜吹或動或止又若文姬將賦而思丰茸旖旎互交  
遞倚又若麗華侍宴初醉狂風狂雨一陣紅去又若褒  
姁初隨戎虜滿地春色階前砌側又若戚姬死於鞠域  
花品之中此花最異以衆為繁以多見鄙自是物情非  
闕春意若氏族之斥素流品秩之卑寒士他目則目他  
耳則耳或以昵而稱珍或以疎而見貴或有實而花乖

或有花而實悴至若實可充腹花可娛目匪乎茲花他  
則碌碌我欲品花此為第一懼俗情之橫議惟獨斷之  
一已我目我目吾耳吾耳妍媸決於我口取舍決於我  
志豈為草木之獨然信為國芳如是

原頌梁江淹山桃頌曰惟園有肴惟山有叢丹葩擎露  
紫榮繞風引霧如電映煙成虹伊春之秀迺華之榮

御定淵鑑類函卷三百九十九

欽定四庫全書

御定淵鑑類函卷四百

果部二

梅

梨

甘

梅一

原詩義疏曰梅杏類也

西京雜記曰上林有雙梅紫

梅同心梅麤枝梅

增石湖梅譜曰紅梅猶是梅而葉

密如杏與江梅同開紅白相間園林初春絕景也 又

曰蠟梅本非梅類以其與梅同時香又相近色酷似蜜

脾故名蠟梅山谷謂京洛間有一種梅類女工撚蠟所成故以名之張翊花經首云一品九命蠟梅亦在其中蠟梅原名黃梅故王安國熙寧間尚有詠黃梅詩至元祐間蘇黃門命為蠟梅又曰凡梅花附蒂皆絳紫色惟此純綠枝梗亦清高好事者比之九疑仙人萼綠華云詩曰絳綰縞袂各朝元只有散仙名萼綠風俗通曰五月有落梅風江淮以為信風原毛詩曰標有梅其實七兮又曰山有嘉卉侯栗侯梅大戴禮夏小

正曰五月煮梅為豆實 增埤雅曰梅花中尤香者

原詩義疏曰梅曝乾為腊羹臠壺中又可以含之口香  
吳氏本草曰梅核能明目益氣不飢

## 梅二

原西京雜記曰漢初修上林苑羣臣各獻名果有侯梅  
朱梅紫花梅同心梅紫蒂梅燕脂梅麗友梅 東方朔  
傳曰朔門生三人俱行乃見一鳩一生曰今當有酒一  
生曰其酒必酸一生曰雖得酒不得飲也三生皆到須



與主人出酒即安樽於地而覆之訖不得酒乃問其故

曰出門見鳩飲水故知得酒鳩飛集梅樹故知酒酸鳩

飛去所集枝折故知不得飲之神異經曰橫公魚長

七八尺形狀如鯉而目赤晝在湖中夜化為人刺之不

入煮之不死以烏梅二七煮之即熟食之治邪病語

林曰范汪能嗽梅人嘗致一斛奩留汪食之須臾盡

伍端林江陵記曰洪亭邨下有梅迴邨舊云是梅槐合

生成樹是以名之今音訛謂之梅迴增荊州記曰陸

凱與范曄相善自江南寄梅花一枝詣長安與曄並贈  
詩曰折梅逢驛使寄與隴頭人江南無所有聊贈一枝  
春 四明圖經曰大梅山在鄞縣東七十里蓋漢梅子  
真舊隱也山頂有大梅木其上則伐為會稽禹廟之梁  
其下則為它山堰之梁禹廟之梁張僧繇畫龍於其上  
夜或風雨飛入鏡湖與龍鬪後人見梁上水淋漓而萍  
藻滿焉始駭異之乃以鐵索鎖於柱 彙苑詳注曰榔  
梅在太和山相傳真武折梅枝寄榔樹之上仰天誓曰

吾道若成花開果結後竟如其言今樹尚存 又曰永

嘉閨婦以青梅雕刻脫核鏤以花鳥纖細可愛以手擘

之玲瓏如小盒闔之復為梅謂之梅籃李詩珍盤薦雕

梅即此 原述異記曰嘉興縣朱休之有一弟宋元嘉

中兄弟對坐家有一犬來向休之蹲徧視二人遂搖頭

而笑曰言我不能歌聽我歌梅花今年故復可柰汝明

年何其家驚懼斬犬胸首路側至來歲梅花時兄弟相

鬪弟奮戟傷兄官收治並被囚繫經歲得免至夏舉家

時疾母及弟兄皆死 宋書曰武帝女壽陽公主卧含

章檐下梅花落公主額上成五出花拂之不去皇后留

之自後有梅花妝 梁書曰何遜為揚州法曹廨舍有

梅樹一株時吟詠其下後居洛思梅花請再任從之抵

揚花方盛開對花徬徨終日 煙花錄曰隋素寶兒多

憨態宮中號司花女又曰梅花笛

梅花本笛中曲名  
梅似帝笛似素也

龍城錄曰隋開皇中趙師雄遷羅浮日暮於林間酒肆

旁舍見美人素妝出迎與語言極清麗芳香襲人與之

扣酒家共飲一綠衣童子歌於側師雄醉寐東方既白  
起視梅花樹上有翠羽刺嘈相顧所見蓋花神 增古

今合璧曰宋廣平為相貞姿勁質剛態毅狀疑其鐵石  
心腸不解吐媚辭然觀其作梅花賦清便富豔得南朝  
徐庾體殊不類其為人 海墨微言曰李白遊慈恩寺

僧獻綠英梅 常朝錄曰元稹為翰林承旨朝退行至  
廊下時初日映九英梅隙光射稹有氣勃勃然百僚望  
之曰豈腸胃文章映日可見乎 羣芳譜曰大庾嶺即

五嶺之一漢武帝擊南越楊僕遣部將庾勝屯兵於此  
因名大庾其初險峻行者苦之自張九齡開鑿始可車  
馬其上多植梅 古今詩話曰李後主於宮中作紅羅  
亭四面栽紅梅作豔曲歌之 談苑曰王曾布衣時以  
梅花詩獻呂蒙正云而今未問和羹事且向百花頭上  
開蒙正云此生已安排狀元宰相也 冷齋夜話曰王  
文公居鍾山嘗與薛處士棊賭梅詩輸一首曰華髮尋  
香始見梅一枝臨路雪培堆鳳城南陌他年憶杳杳難

隨驛使來

石湖梅譜曰晏元獻公自姑蘇移植西岡

園中一日貴遊賂園吏得一枝分接由是都下有二本  
王琪君玉時守吳郡以詩遺公曰館娃宮北發精神粉  
瘦瓊寒露葉新園吏無端偷折去鳳城從此有雙身

后山集曰王直方家有蘇黃字遂取宋武帝謂謝晦謝  
混一時頃有兩玉人名亭亭前有梅陳后山有詩曰頃  
有亭前玉色梅情知不肯破寒開似憐顚顚兩公客獨  
倚東風遣信來 羣芳譜曰林逋隱居孤山徵辟不就

構巢居閣繞梅花吟詠自適徜徉湖上或連宵不返

又曰宋張功甫園中植梅三百本築堂數間花時居宿  
其中環潔輝映朗如對月因名其堂曰玉照 又曰華光  
長老寫梅黃魯直觀之曰如嫩寒春曉行孤山水邊籬  
落間但欠香耳 又曰洛都賣花者爭先為奇冬初折  
未開枝置浴室中熏蒸令坼強名早梅終瑣碎無香余  
頃守桂林立春梅已過元旦則嘗青子皆非風土之正  
杜子美詩云梅蕊臘前破梅花年後多惟冬春之交正



是花時耳

按此條係范成大語

又曰王冕隱九里山樹梅花千

株桃李居其半結茅廬三間自題為梅花屋 地里志

曰洪州土貢梅煎

### 梅三

原紫蒂

白花

上詳梅二轉諧淑草木

劉義慶遊鰲湖詩曰暄景日滋長梅花覆樹白桃杏

發榮

一枝

三實

劉向說苑曰越使諸發執一枝梅遣梁王梁王之臣曰韓子顧左右

光

曰惡有一枝梅乃遺列國之君乎 毛詩曰標有梅其實三兮

明目

香口

俱見梅一

雲山乾腊

洛溪繁榮

山海經曰雲山之上其實乾腊郭璞注腊乾梅也 潘岳閒居

賦曰退而閒居於洛之渚又曰梅杏郁棣之屬繁華麗藻之飾華實照爛言所不能及也

增紫華

綠萼

事類賦折靈山兮攀上林賞紫華兮玩同心下詳梅二

清癯

低小

聖梅

俞詩玉骨綃裳韵太孤天教飛雪伴清癯朱希真詠梅詞瓊枝低小雪天分外精神好

返魂

同夢

東坡詩返魂香入嶺頭梅又和楊公濟梅花詩誰信幽香是返魂王昌齡梅詩落落莫莫路不分

夢中喚起梨花雲東坡梅詞云高情已逐曉雲空不與梨花同夢用此也詩標有梅頂筐堅之標落也言漸落

原頂筐調鼎

多尚書曰若作和羹爾惟鹽梅

止渴

苦酸

魏武

帝與軍士失道大渴而無水遂令曰前有梅林結子甘酸可以止渴士卒聞之皆口中水出遂得及泉源也

鮑昭詩食梅常苦酸

庾嶺

墓門

大庾嶺上梅南枝落北枝開詩墓門有梅

酢

杏

乾榛

爾雅曰梅柎似杏實酢  
饋食之遵其實乾榛乾榛梅也

周禮

嘉卉

生

梅

俱詳  
梅二

標梅之詠見彼詩人

落梅之歌聞諸樂府

上見梅一曲  
府有落梅之曲

古樂

增浸佛桑

為臞瘠

荔枝譜民間  
以鹽梅鹵浸

佛桑花為紅漿投荔枝晴乾曝之色紅而甘  
酸可三四年不壞  
梅曝乾為腊羹臠壺

冰肌玉

骨

雪魄冰魂

東坡詠梅玉骨那愁瘴霧冰肌自有仙  
風謝惠連詩夢斷笛悲風渚吹闌月

澹煙邨空想暗香靚  
色誰招雪魄冰魂

粉藥瓊枝

暗香疎影

朱希真  
詠梅寒

陰漸曉報驛使探春南枝開早粉藥弄香芳臉凝酥瓊  
枝低小雪天分外精神好林和靖句周美成詞暈酥

砌玉芳英嫩故把春心輕漏孤岸峭疎影橫斜濃  
香暗霑襟袖壽陽謾闌終不似照影一枝清瘦

五

月落

一枝斜

黃鶴樓中吹玉笛江城五月落梅  
花東坡詩竹外一枝斜更好

落

梅風

迎梅雨

並詳  
梅二

梅四

原百人酸

淮南子曰梅以為百人酸不足一  
梅不足為一人之酸喻衆能濟

增輦春

杜甫詩曰夜  
雪輦梅春

紅綻雨肥

杜甫詩曰紅  
綻雨肥梅

花御史

劉行  
簡詩

曰我嘗品江梅  
真是花御史

梅五

原詩梁簡文帝雪裏覓梅花詩曰絕訝梅花晚爭來雪

裏窺下枝低可見高處遠難知俱羞惜腕露相讓道腰

羸定須還剪綵學作兩三枝 元帝詠梅詩曰梅含今

春樹還臨先日池人懷前歲意花發去年枝 鮑泉詠

梅花詩曰可惜階下梅飄蕩逐風迴度簾拂羅幌紫窗

落梳臺乍隨纖手去還因插鬢來客心屢看此愁眉斂

俱開 何遜詠早梅詩曰兔園標物序驚時最是梅銜

霜當路發映雪擬寒開枝橫却月觀花繞凌風臺知應

早飄落故逐上春來 王筠和孔中丞雪裏梅花詩曰

水泉猶未動庭樹已先知翻光同雪舞落素混冰池今  
春競時發猶是昔年枝唯有長顚顚對鏡不能窺 庾  
肩吾同蕭左丞詠摘梅花詩曰窗梅朝始發庭雪晚初  
消折花牽短樹幽叢入細條垂冰溜玉手含刺冒春腰  
遠道終難寄馨香徒自饒 周庾信詠梅花詩曰常年  
臘月半已覺梅花闌不信今春晚俱來雪裏看樹動懸  
冰落枝高出手寒早知覓不見真悔著衣單 陳陰鏗  
詠雪裏梅詩曰春近寒難轉梅舒雪尚飄從風還共落

照日不俱消葉開隨足影花多助重條今來漸異昨向

晚判勝朝 謝夔詠早梅詩曰迎春故早發獨自不疑

寒畏落衆花後無人別意看 江總詠梅花落詩曰臘

月正月早驚春衆花未發梅花新梅花芬芳臨玉臺朝

攀晚折還復開滿酌金卮催玉柱落梅樹下宜歌舞金

谷萬株連綺薨梅花密處藏嬌鶯桃李佳人欲相照摘

藥牽花來並笑楊柳條青樓上輕梅花色白雪中明橫

笛短簫悽復咽誰知柏梁聲不絕 增唐王建塞上梅

詩曰天山路傍一株梅年年花發黃雲下昭君已歿漢  
使迴前後征人惟繫馬日夜風吹滿隴頭還隨隴水東  
西流此花若近長安路九衢年少無攀處韓偓梅花  
詩曰梅花不肯傍春光自向深冬有艷陽龍笛遠吹胡  
地月燕釵初試漢宮妝風雖強暴翻添思雪欲侵凌更  
助香應笑暫時桃李樹盜天和氣作年芳王周大石  
嶺驛梅花詩曰仙中姑射接瑤姬成陣清香擁路岐半  
出驛牆誰畫得雪英相倚兩三枝李嶠詠梅詩曰大



庾斂寒光南枝獨早芳雪含朝暝色風引去來香妝面

迴青鏡歌塵起畫梁若能遙止渴何暇乞瓊漿 沈佺

期梅花落詩曰鐵騎幾時迴金閨怨早梅雪寒花已落

風暖葉應開夕逐新春管香迎小歲杯盛時何足貴書

裏報輪臺 張謂早梅詩曰一樹寒梅白玉條迴臨邛

路傍谿橋不知近水梅花發疑是春來雪未消 殷堯

藩山中梅花詩曰南國看花動遠情沈郎詩苦瘦容生

鐵心自擬山中賦玉笛誰將月下橫臨水一枝春占早

照人千樹雪同清好風吹醒羅浮夢莫聽空林翠羽聲  
李紳早梅橋詩曰早梅花滿枝發東風報春春未徹  
紫萼迎風玉枝裂楊柳未黃鶯結舌委素飄香照新月  
橋邊一樹傷離別遊蕩行人莫攀折不競江南豔陽節  
任落東風伴春雪 陸龜蒙和行野梅韻詩曰飛棹參  
差發早梅強欺寒色尚低回風憐薄媚留香與月會深  
情借艷開梁殿得非蕭帝瑞齊宮應是玉兒媒不知謝  
客離腸醒臨水剛逢萬恨來 羅隱紅梅詩曰天賜胭

脂一抹顙盤中磊落笛中哀雖然未得和羹便曾為將

軍止渴來 又詠梅詩曰吳王醉處十餘里照野拂衣

今正繁經雨不隨山鳥散倚風如共路人言愁憐粉豔

飄歌席靜愛寒香撲酒尊欲寄所思無好信為君惆悵

又黃昏 宋林逋山園小梅二詩曰衆芳搖落獨暄妍

占盡風情向小園疎影橫斜水清淺暗香浮動月黃昏

霜禽欲下先偷眼粉蝶如知合斷魂幸有微吟可相狎

不須檀板共金尊 又曰翦綃零碎照酥乾向背稀稠

畫益難日暮縱甘春至晚霜深應怯夜來寒澄鮮祇共

鄰僧惜冷落猶嫌俗客看憶著江南舊行路酒旗斜拂

墮吟鞍 王安石梅花詩曰漢宮嬌額半塗黃粉色凌

寒透薄妝好借月魂來映燭恐隨春夢去飛揚風亭把

盞酬孤艷雪徑回輿認暗香不為調羹應結子直須留

此占年芳 又曰結子非貪鼎鼐嘗偶先紅杏占年芳

從教臘雪埋藏骨却怕春風漏洩香不御鉛華知國色

祇栽雲縷想仙裳少陵為爾牽詩興可是無心賦海棠

又曰淺淺池塘短短牆年年為爾惜流芳向人自有  
無言意傾國天教抵死香鬚裊黃金危欲隨蒂團紅蠟  
巧能裝嬋娟一種如冰雪依舊春風笑野棠 歐陽修  
次韻王適梅花詩曰江梅似欲競新年照水窺林態愈  
妍露重清香渾欲滴月明素質自生煙生成細實酸猶  
薄半落南枝意可憐誰寫江西風物樣徐家向有數枝  
傳 朱子梅詩曰姑射仙人冰雪容塵心已共彩雲空  
年年一笑相逢處長在愁煙苦霧中 陸游梅花詩曰

家是江南友是蘭水邊月底怯新寒畫圖省識驚春早  
玉笛孤吹怨夜殘冷澹合教閒處著清癯難遣俗人看  
相逢賸作尊前悵索笑情懷老漸闌 又曰月地雲階  
暗斷腸知心誰解賞孤芳相逢祇怪影亦好歸去始驚  
身染香渡口耐寒窺淨綠橋邊凝怨立昏黃與卿俱是  
江南客賸欲尊前說故鄉 又得梅一枝賦詩曰高標  
已壓萬花羣尚恐嬌春習氣存月兔擣霜供換骨湘娥  
鼓瑟為招魂孤城小驛初飛雪斷角殘鐘半掩門盡意

端相終有恨夜寒皺玉倩誰溫 又梅花絕句月中疎

影雪中香只為無言更斷腸曾與詩翁定花品一丘一

壑過姚黃 又曰蜀王小苑舊池臺江北江南萬樹梅

只怪朝來歌吹鬧園官已報五分開

自注云曾文清公嘗問予梅與牡丹

孰勝予以此答成都合江園蓋故蜀別院梅最盛自初開監官日報府報至五分開則府主來宴遊人亦競集

又雪後尋梅詩曰青帝宮中第一妃寶香熏徹素綃

衣定知謫隋不容久萬斛玉塵來聘歸 又曰樂殿仙

姝下界遊偶來稅駕剡溪頭君看月裏橫枝影盡是蒼

龍與翠虯 又射的山觀梅詩曰射的山前雨墊巾籬

邊初見一枝新照溪洗盡嬌春意倚竹真成絕代人餐  
玉元知非火食化衣應笑走京塵即今畫史無名手試  
把清詩當寫真 又曰凌厲冰霜節愈堅人間乃有此  
癯仙坐收國士無雙價獨立東皇太乙前此去幽尋應  
盡日向來別恨動經年花中竟是誰流輩欲許芳蘭恐  
未然 又梅花絕句曰當年走馬錦城西曾為梅花醉  
似泥二十里中香不斷青羊宮到浣花溪 又曰亂簪



桐帽花如雪斜挂驢鞍酒滿壺安得丹青如顧陸憑渠

畫我夜歸圖 蘇軾梅花詩曰洗盡鉛華見雪肌要將

真色鬪生枝檀心已作龍涎吐玉頰何勞獺髓醫 又

紅梅花詩曰上人自恨探春遲不見檀心未吐時丹鼎

奪鉛那是寶玉人頰頰更多姿抱叢暗藥初生子落盡

濃香已透肌乞與徐熙畫新樣竹間璀璨出新枝 又

詩曰西湖處士骨應稟只有此詩君壓倒東坡先生心

已灰為愛君詩被花惱多情立馬待黃昏殘雪消遲月

出早江頭千樹春欲盡竹外一枝斜更好孤山山下醉  
眠處點綴裙腰粉不埽萬里春隨遠客來十年花送佳  
人老不知風雨卷春歸收拾餘香還畀昊 蘇轍梅花  
詩曰病夫毛骨日凋槁愁見米鹽惟醉倒忽傳騷客賦  
寒梅感物傷春同懊惱江邊不識朔風勁牆頭亦有南  
枝早未開素質夜先明半落清香春更好鄰家小婦學  
間媚靚妝惟有長眉婦孤芳已與飛霞競結子仍先百  
花老苦遭橫笛亂飛英不見遊人醉芳草可憐物性空

自知羞作繁華助  
范成大次韵和郡安撫元夕

賞倅廳紅梅詩曰春入林梢一再風  
破寒勻染費天工

雖然媚蕩新妝別  
只與橫斜舊格同  
午枕乍醒鉛粉退  
曉奩初罷蠟脂融  
從來顏色休論似  
夾路漫山取次紅

元劉秉忠江邊梅樹詩曰江邊繚繞惜芳叢  
絕筆天

真在眼中素艷乍開珠  
蓓蕾暗香微度玉玲瓏  
一枝倒影斜斜月  
滿樹浮光細細風  
明日行經山下路  
幾回特地駐青驄  
郝經江梅行曰江城畫角吹吳霜  
破月著

水天昏黃波澄煙吐林影澹雙梅帶雪橫溪塘此時承  
平風物盛家家種玉栽琳琅朝來伴使宴江館銀鉶亂  
插吹銀管霏微香霧入紅袖零亂春雲繞金盃都将和  
氣變荒寒錦瑟愁生燕玉煖為言儀真梅最多苔花古  
樹深婆娑一年十月至二月紅紅白白盈江沱自從天  
馬飲江水草根喫盡梅無柯楊子人家楚三戶今年幸  
有燒殘樹忽聞星使議和來盡貯筠籠待供具從今江  
梅好顏色爛醉長吟嚼佳句 吳澄疊葉梅詩曰羅浮

夢斷杳無蹤冰雪仙姿兩兩逢  
縞被却單寒後襲粉妝  
嫌薄曉來濃迎風一笑知顏厚  
臨水相看見影重道眼  
只將平等視玉環飛燕總天容  
趙孟頫梅花詩曰瀟  
灑江梅似玉人倚風無語澹生春  
曲中桃葉原非侶夢  
裏梨花亦未真 薩都拉燈夕觀梅詩曰翠禽偷夢出  
南園綽約冰姿倚綠尊冰鏡玉釵浮翠影風簾銀燭照  
妝痕粉香微爛無人見素質多寒藉酒溫不似海棠春  
睡去西樓月落已黃昏 謝宗可紅梅詩曰梨雲無夢

倚黃昏薄倩朱顏蝕淚痕宿酒破寒熏玉骨仙丹偷暖  
返冰霓茜裙影露羅衣卷霞佩香封縞被溫回首孤山  
斜照外尋真誤入杏花村 楊維禎紅梅詩曰羅浮仙  
子宴瓊宮海色生春醉壓紅十二闌干明月夜九霞帳  
裏睡東風 丁鶴年紅梅詩曰姑射仙人鍊玉砂丹光  
晴貫洞中霞無端半夜東風起吹作江南第一花 明  
王冕梅花詩曰疎枝錯落花燦爛正似推蓬溪上看凍  
痕不剝五更霜蘚色猶存百年幹孤山處士詩夢寒羅

浮仙人酒興闌天荒地老行路難誰傳春色來人間君  
不見江南物色今非昔大谷長林盡荆棘歲寒何處論  
襟期坐對雲山空歎息東樓女兒白苧歌西樓美酒喚  
杏花縱有高人愛高潔蹋雪誰肯來山家老我無能慣  
清苦寫梅種梅千萬樹霜清月白夜更長每是狂歌不  
歸去只今潦倒雙鬢垂世情雜雜俱忘機讀書寫字兩  
眼眵斷白搔墮隨花飛轉首江南隔塵土白月流光雙  
鶴舞一聲羌管過南樓鐵石心腸亦淒楚安得喚起陳

元龍長船滿載玻瓈紅浩歌拍拍隨春風大醉驚倒江  
南翁 又紅梅詩曰深院春無限香風吹綠漪玉妃清  
夢醒花雨落胭脂 又曰昭陽殿裏醉春風香隔瓊簾  
映淺紅翠袖擁雲扶不起玉簫吹過小樓東 又梅花  
詩曰馬跡山前萬樹梅千花萬花如雪開滿載揚州秋  
露白玉簫吹過太湖來 又曰斷雲流水孤山路看得  
春風幾樹花騎馬歸來城郭是月明簫管起誰家 高  
啓梅花詩曰瓊姿只合在瑤臺誰向江南處處栽雪滿



山中高士卧月明林下美人來寒依疎影蕭蕭竹春掩  
殘香漠漠苔自去何郎無好韻東風愁寂幾回開 又  
曰縞袂相逢半是仙平生水竹有深緣將疎尚密微經  
雨似暗還明遠在煙薄暝山家松樹下嫩寒江店杏花  
前秦人若解當時種不引漁郎入洞天 又曰澹澹霜  
華濕粉痕誰施綃帳護香溫詩隨十里尋春路愁在三  
更挂月邨飛去只疑雲作伴銷來肯信玉為魂一尊欲  
訪羅浮客落葉空山正掩門 又曰竄愛寒多最得陽

仙遊常在白雲鄉春愁寂寞天應老夜色朦朧月亦香  
楚客不吟江路寂吳王已死苑臺荒枝頭誰見花飛處  
嫋嫋微風簌簌霜

原賦梁簡文帝梅花賦曰層城之宮靈苑之中奇木萬  
品庶草千叢光分影雜條繁榦通寒圭變節冬灰徙筍  
並皆枯悴色落摧風年歸氣新搖雲動塵梅花特早偏  
能識春或承陽而發金乍襍雪而披銀吐艷四照之林  
舒榮五衢之路既玉綴而珠離且冰懸而電布葉嫩出

而未成枝抽心而插故標半落而飛空香隨風而遠度  
挂靡靡之遊絲雜霏霏之晨霧爭樓上之落粉奪機中  
之織素乍開花而傍巘或含影而臨池向玉階而結彩  
拂網戶而低枝七言表柏梁之詠三軍傳魏武之奇於  
是重閨佳麗貌婉心嫺憐早花之驚節訝春光之遣寒  
袂衣始薄羅袖初單折此芳花舉茲羅袖或插鬢而問  
人或殘枝而相授恨鬟前之太空嫌金鈿之轉舊顧影  
丹墀弄此嬌姿洞開春牖四卷羅帷春風吹梅畏落盡

賤妾為此斂蛾睂花色持相比恒愁恐失時 陳暄食  
梅賦曰魏無林而止渴范留信而先嘗賜一時之名果  
遂懷核而矜莊昔詠酸棗之臺今食酸味之梅眼同曹  
瞞之見樹形異韋誕之聞雷宵既咽而思鳩杖悶欲死  
而想仙杯拜投壺而天笑等王孫而客哈 增唐宋璟  
梅花賦曰垂拱三年余春秋二十有五戰藝再北從父  
至東川授館官舍有梅一本數蘗於榛莽中喟然歎曰  
嗚呼斯梅託根非其所出羣之姿何以別乎若其貞心

不改是則可取也已感而成興遂作賦曰高齋寥閨歲  
晏山深景翳翳以斜度風悄悄而亂吟坐窮荒其用遣  
進一觴而孤斟步前除而彳亍倚藜杖於牆陰蔚有寒  
梅誰其封殖未綠葉而先藹抽青枝於容卉光分影布  
水玉一色胡雜還乎衆草又蕪沒乎叢棘匪王孫之見  
幻羌潔白其何極若夫瓊英綴雪絳萼著霜儼如傅粉  
是謂何郎清香潛襲疎檠暗襲又如竊香是謂韓壽凍  
雨晚濕宿露朝滋又若英皇泣於九疑暖日烘晴明蟾

照夜又如神人來從姑射煙晦晨昏陰霾晝閉又如通

德掩袖擁髻狂飈卷沙飄素摧柔又如綠珠輕身墜樓

半開半含非默非言溫伯雪子目擊道存或俯或仰匪

笑匪怒東朝順子正容物悟或顚顚若靈均或歌傲若

曼倩或嫵媚若文君或輕盈若飛燕口吻雌黃擬議殆

徧其藝蘭兮九畹采蕙兮五柝緝之以芙蓉贈之以芍

藥玩小山之叢桂掇芳洲之杜若夫是皆物出於榮產之

奇名著於風人之託然而艷於春者望秋先悴盛於夏

者未冬而萎或朝黉而速謝或夕秀而遂衰曷若茲卉  
歲寒特妍冰凝返涸擅美專權相彼百花孰敢爭先鶯  
語方澀蠶房未喧獨步早春自全其天至若措跡隱深  
寓形幽絕恥鄰市塵甘遯巖穴江僕射之孤燈向壁不  
可悽迷陶彭澤之三徑投閒曾無帽結貴不移於本性  
方有儷於君子之節聊染翰以寄懷用垂示於來哲從  
父見而勗之曰萬木僵仆梅英載吐玉立冰姿不易厥  
素子善體物永保貞固 宋朱子梅花賦并序曰楚襄

王遊乎雲夢之野觀梅之始花者愛之徘徊而不能舍  
焉驂乘宋玉進曰美則美矣臣恨其生寂寞之濱而榮  
此歲寒之時也大王誠有意好之則何若移之渚宮之  
園而終觀其實哉宋玉之意蓋以屈原之放微悟王而  
王不能用於是以退而獻賦曰夫何嘉卉而信奇兮厲歲  
寒而方華潔清姱而不淫兮專精皎其無瑕既笑蘭蕙  
而易誅兮復異乎松柏之不華屏山谷以自娛兮命冰  
雪而為家謂后皇賦予命兮生南國而不遷雖瘴癘非



所託兮尚幽獨之可願歲序徂以崢嶸兮物皆舍故而  
就新披宿莽而橫出兮廓獨立而增妍玄霧瀟而四起  
兮川谷互而冰堅澹容與而不銜兮象姑射而無鄰夕  
同雲之繽紛兮林莽雜其歲難曾予質之無加兮專皎  
潔而未衰方酷烈而閭閻兮信橫發而不可摧紛旖旎  
亦何好兮靜窈窕而自持徂清夜之湛湛兮玉繩耿而  
未低方娉婷而自喜兮友明月以為儀歟浮雲之來蔽  
兮四顧莽而無人悵寂莫其淒涼兮泣回風之無辭立

何久乎山阿兮步何躊躇於水濱忽舉目而有見兮恍  
顧盼之足疑謂彼漢之廣兮羌何為乎人間既竒服之  
曜耀兮又綽約而可觀欲一聽白雲之歌兮歎揚音之  
不可聞將結軫乎瑤池兮懼佳期之非真願借陽春之  
白日兮及芳菲之未虧與遲暮而零落兮曷若充夫佩  
褱渚宮矧未有此兮縱草棘之縱橫椒蘭後乎霜雪兮  
亦何有乎芳馨俟桃李於載陽兮倉庚寂而未鳴私顧  
影而自憐兮澹愁思之不可更君性好而不取兮亦吾

命其何傷辭曰后皇貞樹豔以姱兮潔誠諒清有嘉賓  
兮江南之人羌無以異兮煢獨處廓豈不可召兮層臺  
累榭靜而可樂兮王孫兮歸來無使哀江南兮

增歌唐白居易歌曰食檠不易食梅難檠能苦兮梅能  
酸未知生別之為難苦在心兮酸在肝晨雞載鳴殘月  
沒征馬重嘶行人出回看骨肉哭一聲梅酸檠苦甘如  
蜜黃河水白黃雲秋行人河邊相對愁天寒野曠何處  
宿棠梨葉戰風颼颼生離別憂從中來不可斷絕憂積

心勞血氣衰末年三十生髮白

增序宋范成大梅譜後序曰梅以韻勝以格高故以橫  
斜踈瘦與老枝竒怪者為貴其新接樺木一歲抽嫩枝  
直上或三四尺如酴醾薔薇之類者吳下謂之氣條此  
直宜取實規利無所謂韻與格矣

增文宋周之翰燕梅文曰寒勒銅瓶凍未開南枝春斷  
不歸來這回勿入梨花夢却把芳心作死灰恭惟地爐  
中處士梅公之靈生自羅浮派分庾嶺形如枯木稜稜

山澤之輝膚若凝脂凜凜冰霜之操早春魁百花頭上  
歲寒居三友圖中玉堂茅舍本無心金鼎商羹期結果  
不料道人見晚便離有色之根夫何冰氏相凌遽返華  
胥之國玉骨擁爐烘不醒深窺翦紙竟難招紙帳夜長  
猶作尋香之夢筠窻月澹尚疑弄影之時雖宋廣平鐵  
石心腸忘情未得使華光老丹青手段摸索未真却愁  
零落一枝春好與荼毘三昧火

增記宋范成大記曰梅天下尤物無問智愚賢不肖莫

敢有異議學圃之士必先種梅且不厭多他花有無多少皆不繫重輕余於石湖玉雪坡既有梅數百本比年又於舍南買王氏儵舍七十楹盡圻除之治為范邨以其地三分之一與梅吳下栽梅特甚其品不一今始盡得之隨所得為之譜以遺好事者

# 梨一

原許慎說文曰梨果也從木利聲 增爾雅曰梨山檇

郭注即今梨樹梨曰攢之 格物叢話曰梨數種大者幾如盃

有青黃紫三色肉白於雪核少食之甘脆咽查滓者為佳品另一種熟時糜爛可口謂之金鳳梨亦其次也

原廣志曰洛陽北邙張公夏梨海內惟有一樹廣都梨重六斤數人分食之有常山真定山陽鉅野梨梁國睢陽梨齊都臨淄梨鉅鹿橐梨上黨棹梨小而甘新豐箭谷梨闕以西梨多供御 增又梨一名悛果一名玉乳一名蜜父三輔黃圖名含消梨大如五升器入口即消又乳梨出宣城皮厚肉實味甘鵝梨出河南北州郡

味差短 又紫梨花以秋日開紅色 西京雜記曰上

林苑有紫梨青梨大谷梨縹葉梨芳梨細葉梨金葉梨

紫條梨瀚海梨東王梨俱出海中 原毛詩曰蔽芾甘

棠勿剪勿伐

注曰棠杜也一名梨而小也

增山海經曰洞庭之中

其木多梨 原魏文詔曰真定御梨大若拳甘若蜜脆

若凌可消煩釋餽

一作反

潘岳閒居賦曰張公大谷之

梨 增孫楚秋賦曰紫梨甜脆 原何晏九州論曰安

定好棗中山好栗魏郡好杏河內好稻真定好梨 傳



吳七誨曰襄陽黃梨 增廬毓冀州論曰常山好梨地  
產不為無珍

梨二

原尹喜內傳曰老子西遊省太真王母共食碧梨紫梨  
神異經曰東方有樹高百丈敷張自輔葉長一丈廣  
六尺名曰梨其子徑三尺剖之白如素食之為地仙可  
入水火 洞冥記曰塗山之背梨大如升色紫千年一  
花亦曰紫輕梨 辛氏三秦記曰漢武帝園一名樊川

一名御宿有大梨如五升餅落地則破其主取者以布囊盛之名含消梨 曹瞞傳曰王自漢中至洛陽起建始殿使工蘇越往徙美梨掘之根盡血出越白狀王躬自視之以為不祥還遂寢疾 文士傳曰孔融年四歲與諸兄食梨輒取其小者人問其故答曰小兒法當取小者 神仙傳曰介象為吳王所徵在武昌連求去不許象言病帝以美梨一奩賜之象死殯而埋之以日中時死其晡時到建業以主所賜梨付守苑吏種之 增

太平御覽曰魏武帝為兗州牧上書曰山陽郡有美梨  
謹上甘梨二箱 原晉令曰諸官秩梨守護者置吏一  
人 晉書曰苻雙據上邽苻柳據蒲坂叛於堅苻武據  
安定並應之將共戕長安堅遣諭之各齧梨以為信皆  
不受命 增世說曰道安公講僧常數百習鑿齒嘗餉  
十梨值講安公便於座中手自剖分梨盡人徧都無頗  
又曰桓南郡每見人不悛輒瞋云君得哀家梨頗復  
蒸食否舊說秣陵有哀仲家梨甚美大如升入口消釋

言愚人不別味得好梨而蒸食之也 齊書曰扶桑國

有赤梨經年不壞 原幽明錄曰成彪兄喪晝夜哭泣

兄提二升酒一盤梨就之引酌相勸彪問畧答彪悲咽

問兄今在天上福多苦少久弗應肅然無言瀉餘酒著

甌中挈甌而去 永嘉記曰青田邨人多種梨有一株

名曰官梨一圍五寸以供獻名御梨 南康記曰歸田

石城內有梨熟人食其實任意取足持歸家人噉輒病

或顛仆失徑亡命味似秋梨 增唐書曰崔遠文才清

麗風神峻整當時目為釘坐梨言席上之珍 鄴侯別

傳曰唐肅宗嘗夜坐召潁王等三弟同於地爐坐罽毼  
時李泌絕粒上自燒二梨以賜之潁王等曰陛下恩渥  
先生如此臣等聯句以為他年故事潁王曰先生年幾  
許顏色如童兒信王曰夜枕九仙骨朝披一品衣一王  
曰不食千鍾粟惟餐兩顆梨上曰天生此間氣助我化  
無為 地里志曰河中府土貢鳳棲梨 金鑒密記曰  
九仙殿銀井有梨二株枝葉交結宮中呼為雌雄梨

洛陽伽藍記曰報德寺有含消梨重六斤從樹投地盡  
化為水 唐餘錄曰洛陽梨花開時人多攜酒樹下謂  
為梨花洗妝宴 湘山野錄曰李建勲罷相出鎮豫章  
一日遊西山田間茅舍有老叟教數村童公觴於其廬  
連食數梨賓僚有曰梨號五藏斧斤不宜多食叟歎曰  
鷗冠子五藏斧斤乃別離之離非謂梨也蓋離別則殘  
賊胃懷有若刀斧因就架取鷗冠子呈之公大歎服  
長慶集曰杭州俗釀酒趁梨花開時熟號梨花春故杭

州春望詩曰紅袖織文誇柿蒂青旗酤酒趁梨花

梨三

原真定

廣都

並詳  
梨一

靈關

御宿

上見謝朓謝梨  
啓下詳梨二

增帶雨

送春

白居易詩曰玉容寂寞淚闌干梨花一枝春帶雨  
杜牧詩曰梨花獨送春

原大谷

鉅野

並詳  
梨一

生玄圃

種青田

上見王讚  
梨頌下

詳梨

甘香

津潤

韓子曰夫樹榘梨橘柚者食之則甘歟之則香  
左思蜀都賦曰紫

梨津潤榛潤罇發

增可口

同心

莊子曰三王五帝之禮義法度不同譬其猶櫨梨橘

抽邪其味相反而皆可於口  
呂光時燉煌太守宋歆獻同心之梨

段龜龍涼州記曰

壓

帽洗妝俱詳梨二

粉棠雪浪

冷艷靚妝

周美成詠梨花詞雪裏翻

空粉堂鵲夜東坡詩冷豔不饒梅共色靚妝長與月為隣

解煩消餽

音春

敲齒

沃心

上詳梨一辛寅遜詩曰嚼處春冰敲齒冷咽時雪液沃心寒俱見山堂肆考

玉漿

瓊汁

上見丁晉公詩下見楊誠齋詩

貢花

接桑

西路產梨處用刀去皮切作餅

子以火焙乾謂之梨花嘗充貢獻實為佳果中之最花木考曰接梨於桑則脆而味甘俱見彙苑詳注

梨四

原元光

漢武內傳內太上之藥果有元光梨

增溶溶院落

古詩曰梨花院落溶溶月

柳絮池塘澹澹風

露重濕花

白居易詩曰風來露重梨花濕

原等千戶侯



漢書曰淮北蒙南河濟之間千  
樹梨此其人皆與千戶侯等

梨五

原詩梁沈約西地梨詩曰列茂河陽苑蓄紫濫觴隈翻  
黃秋沃若落素春徘徊 又應詔詠梨詩曰大谷來既  
重岷山道又難摧折非所希但令入玉盤 劉孝綽於  
座應令詠梨花詩曰玉壘稱津潤金谷詠芳菲詎匹龍  
樓下素葉映華扉雜雨疑霰落因風似蝶飛豈不憐飄  
墜願入九重闈 後梁宣帝大梨詩曰大谷常流稱南

荒本足珍綠葉已承露紫實復含津 增唐皇甫冉和

王給事維禁省梨花詠詩曰巧解逢人笑還能亂蝶飛

春風時入戶幾片落朝衣 李嶠詠梨花詩曰擅美元光

側傳芳瀚海中鳳文疎象郡花影麗新豐色對瑤池紫

甘依大谷紅若令逢漢主還冀識張公 韓愈詩曰桃

溪惆悵不能過紅艷紛紛落地多聞道郭西千樹雪欲

將君去醉如何 宋文同詩曰寒食北園春已深梨花

滿枝雪圍徧青春每向風外得秀豔應難雪中見 歐

陽修千葉紅梨花詩曰紅梨千葉愛者誰白髮郎君心  
好奇徘徊繞樹不忍折一日千市看無時夷陵寂莫千  
山裏地遠氣偏時節異愁煙苦霧少芳菲野卉蠻花鬪  
紅紫可憐此樹生此處高枝絕艷無人顧春風吹落復  
吹開山鳥飛來自飛去根盤樹老幾經春真賞今纔遇  
使君風輕絳雪尊前舞日暖繁香露下聞從來奇物產  
天涯安得移根植帝家猶勝張騫為漢使殷勤西域徒  
榴花 丁謂詩曰玄圃雲腴滋絳質上林風御獵清香

尋芳尚意瓊為樹，蠲渴應知玉有漿。  
蘇軾詩曰：梨花

澹白柳深青。柳絮飛時花滿城，惆悵東籬一枝雪。人生

能得幾清明。陸游詩曰：嘉陵江色嫩如藍。鳳集山光

照馬銜楊柳。梨花迎客處，至今詩夢到城南。金元好

問梨花詩曰：梨花如靜女，寂莫出春暮。春工惜天真，玉

頰凌風露。素月澹相映，蕭然見風度。恨無塵外人，為續

雪香句。孤芳忌太潔，莫遣凡卉妬。明文嘉詩曰：翦水

凝霜妬蝶羣。曲闌風味玉清溫，粉痕浥露春含淚。夜色

籠煙月斷魂十里香雲迷短夢誰家細雨鎖重門洗裝  
見說清明近旋典春衣置酒尊

增賦唐盧照隣病梨樹賦并序曰癸酉之歲余卧病於  
長安光德坊之官舍父老云是鄱陽公主之邑司昔公  
主未嫁而卒故其邑廢時有處士孫君思邈居之君道  
洽今古學有數術高談正一則古之蒙莊子深入不二  
則今之維摩詰及其推步甲子度量乾坤飛鍊石之奇  
洗胃腸之妙則又甘公洛下閎安期先生扁鵲之儔自

云開皇辛酉歲生今年九十二矣詢之鄉里咸云數百  
歲人矣共語周齊間事歷歷如眼見以此參之不啻百  
歲人也然猶視聽不衰神形甚茂可謂聰明博達不死  
者矣余年垂強仕則有幽憂之疾椿菌之性何其遼哉  
於時天子避暑甘泉邈亦徵詣行在余獨卧茲邑閭寂  
無人伏枕十旬閉門三月庭無衆木唯有病梨一樹圍  
纔數握高僅盈丈花實顛顚似不任乎歲寒枝葉零丁  
絕有意乎朝暮嗟乎同託根於膏壤俱稟氣於太和而

修短不均榮枯殊貫豈賦命之理得之自然將資生之  
化有所偏及樹猶如此人何以堪有感於懷賦之云爾  
天象平運方祗廣植挺芳桂於月輪橫扶桑於日域建  
木聳靈丘之上蟠桃生巨海之側細枝葉連洪柯條直  
齊天地之一指任烏兔之棲息或垂陰萬畝或結子千  
年何偏施之雨露何獨厚之風煙愍茲珍木離離幽獨  
飛茂實於河陽傳芳名於金谷紫澗稱其殊旨元光表  
其仙族爾生何為零丁若斯無棖楠之可用無棟梁之

可施進無為於斤斧退無競於班倕無庭槐之生意有  
巖桐之死枝爾其高纔數仞圍僅盈尺修幹罕雙枯條  
每隻葉病多紫花凋少白夕鳥怨其巢危秋蟬悲其翳  
窄怯衝飈之搖落忌炎景之臨迫既而地歇蒸霧天收  
曜靈西秦明月東井流星顚顚孤影徘徊直形狀金莖  
之的的疑石柱之亭亭若夫西海夸父之林南海蚩尤  
之樹莫不摩霄拂石藏雲吐霧則有橋邊朽柱天上靈  
查年年歲歲無葉無花榮辱兩齊吉凶同軌寧守雌以



外喪不修褻而內否亦猶縱酒高賢佯狂君子為其脗  
合置其憂喜生非我生物謂之生死非我死谷神不死  
混彭殤於一觀庶筌蹄於茲理

增歌唐王建夢看梨花雲歌曰薄薄落落霧不分夢中  
喚作梨花雲瑤池水光蓬萊雪青葉白花相次發不從  
地上生枝柯合在天頭繞宮闕天風微微吹不破白艷  
却愁春浥露玉居綵女齊看來錯認仙山鶴飛過落英  
散粉飄滿空梨花顏色同不同眼穿臂短取不得取得

亦如從夢中無人為我解此夢梨花一曲心珍重

原頌晉王讚梨花樹頌曰太康十一年梨花樹四枝與中枝  
合生於圃皇太子令侍中頌之嘉木時生瑞我皇祚修  
幹外揚隆枝內附翼翼皇儲克光其敬神啓其和人隆  
其盛降自玄圃合體連性時惟令月躬親北林樂在同  
人如蘭如金木之期應乃同其心同心之生啓自神明  
在心斯動於言斯形先民有則稱詩表情惟永作歌以  
休厥靈

原贊宋孝武帝梨花贊曰沃瘠異壤舒慘殊時惟氣在  
春具物含滋嘉樹之生於彼山基開榮布采不離塵緇  
原啓齊謝朓謝隋王賜紫梨啓曰味出靈關之陰旨介  
玉津之澁豈徒真定歸美大谷滋慚將恐帝臺妙棠安  
期靈棗不得孤擅玉盤獨甘仙席雖秦君傳器漢后推  
餐望古可儔於今何答 梁庾肩吾謝齊梨啓曰睢陽  
東苑子園三尺新豐箭谷枝懸六斤未有生因粉水產  
自銅丘影連鄧橘林交苑柿遠薦中厨爰頒下室事同

靈棗有願還年恐似仙桃無因留核

甘一

增格物叢話曰柑者橘之屬滋味甘美特異者也有黃  
赭二色赭者謂之壺柑即乳柑惟泥山為最地不彌一  
里所產柑其大徑六寸皮厚而珍脈不粘瓣食不留滓  
一顆核一二間有全無者生枝柑鄉人以其耐久留之  
枝上俟味變甘帶葉而折故名焉今溫福州江陵天台  
處產之本草曰酸者名胡甘原古今注曰甘實形

如石榴者亦謂之壺甘 盛弘之荊州記曰宜都郡舊

江北甘園名宜都甘 郭義恭廣志曰有甘一核有成

都平帶甘大如升色蒼黃犍為南安縣出黃甘 增又

曰新州出變甘有包大於升者且皮薄如洞庭之橘餘

甘之所不及傳云移植數百里外形味俱變因以為名

亦如橘踰淮為枳乃水土異也 又曰有生枝柑有乳

柑有海紅柑有衢柑品雖不同而溫台之柑最良歲充

上貢焉柑之大者擘破氣如霜霧故杜詩破柑霜落爪

是也 雲南志曰雲南北勝州有獅頭柑狀如獅頭而  
色黃有大如碗者其味最甘 原神異經曰東方裔外  
有建春山其上多柑 崔寔政論曰橘柚之實堯舜所  
不常御山龍華蟲帝王不以為褻服今之臣妾皆餘黃  
柑而厭文繡者蓋以萬數矣

甘二

增異聞錄曰漢武帝時董元素來自江南上召見夜與  
語曰聞公有神術今江南柑橘正熟公能致否對曰請

安一盒於榻前數刻忽有微風入簾啓盒柑滿其中奏云此江陵支縣柑也他處恐來遲帝嘗之驚歎 原謝承後漢書曰丹陽張盤字子石為廬江太守潯陽令嘗餉一奩柑其小男年七歲就取一枚盤奪其柑外卒以兩枚與之盤奪兒柑鞭卒曰何故行賂於吾子 晉書曰王羲之嘗抱弱孫遊觀有一味柑剖而分之以娛目前 增郭子曰王丞相導性儉嗇帳下甘果盈溢涉春壞爛 右軍帖曰奉柑三百果霜未降不能佳 晉令

曰閩中縣置守黃甘吏一人 湘州記曰州故大城內

有陶侃廟地是賈誼故宅誼時種柑猶有存者 宋書

曰彭城王義康時四方獻饋皆以上品薦義康而以次

者供御上嘗以冬月噉甘歎其味並劣義康在坐曰今

年甘殊有佳者遣人還東府取甘大三寸 梁書曰呂

僧珍既有大勲任總心膺性甚恭慎當直禁中盛暑不

敢解衣每侍御座屏氣鞠躬飲食未嘗舉箸醉後取一

柑食武帝笑曰卿今日便是大有所進祿外令月給錢



十萬 隋史曰隋文帝嗜甘蜀州摘黃甘皆以蠟封蒂

獻日久猶鮮 原襄陽記曰李衡字叔平於武陵龍陽

洲上種甘千樹臨終敕其子曰龍陽洲裏有千頭木奴

歲得絹數千匹 述異記曰南陽郡東望山有人入山

山頂有果林衆果畢植行列整齊如人工甘正熟三人

共食致飽訖懷二枚欲以示人間雲中語云催放雙柑

乃聽汝去 增唐史曰開元中有神仙持羅浮柑子種

於南樓寺其後常資進獻至幸蜀幸奉天之歲皆不結

實 又曰荊州進黃柑帝以紫帕包賜蕭嵩 新唐書

曰益州歲進柑子皆以紙裹之他時長吏嫺不敬儀以  
細布既而恐柑子為布所損每懷憂懼俄有御史甘子  
布至長吏以為推布裹柑事懼曰果為所推及子布到  
驛長吏敘以布裹柑子為敬子布初不知之久而方悟  
聞者莫不大笑 開元遺事曰明皇食柑凡千餘枚皆  
缺一瓣問進柑使者云中途嘗有道士獻之蓋羅公遠  
也 東坡集曰安定郡王以黃柑釀酒名曰洞庭春色

程史曰戎州有蔡次律者家於近郊山谷嘗過之延以飲有小軒極華潔檻外植柑子數株因乞名焉題之曰味諫後王子予以橄欖遺山谷有詩曰方懷味諫軒中果忽見金盤橄欖來想共餘甘有瓜葛苦中真味晚方回時蓋徽宗始登極國論稍還是以有此句云

甘三

原平蒂 圓實

上詳甘一 胡濟甘賦曰三秋迭運初寒履霜壺形既兆圓實一煌

披

黃包 系丹實

潘安仁賦曰披黃苞以授甘 劉韶甘賦曰豐條翠葉系以丹實

西

平更生 東望共食

范甯表曰南昌令解列西平里有一甘樹枯死一年後以今年更生

枝葉豐茂今多少  
作子 下詳甘二

若菱花

倂萍實

上見胡濟黃柑賦 下見謝惠

連甘

超玉果

若金璫

上見胡濟甘賦 下見謝惠連賦

增蠟封

布裏

俱詳甘二

上元宴

春日携

東坡詩注唐故事賜近臣黃甘以黃羅包之人

各二枚上元以黃甘遺近臣謂之傳甘宴 雜記戴顒字仲若春日攜雙柑斗酒人問何之曰往聽黃鸝聲

金衣爛日

素質凌霜

天寶年宰臣賀蓬萊宮甘子結實表綠蒂含霜芳流綺殿

金衣爛日色麗彤庭  
下詳謝惠連賦

甘踰石蜜

寒比蔗漿

上見梁皇太子

表 下見

珍果

嘉實

歐陽修云歸田錄載其香清味美置之尊俎間光彩灼爍

劉禹錫表

如金彈丸誠珍果也

下詳梁宗炳頌

廿四

增祠用

盧諶祭法曰冬祠用甘

登俎

杜甫詩曰登俎黃柑重

渴者思

張載

詩曰三巴黃

天恩賜

孔坦表曰天恩例賜靈酒黃柑不勝受遇

遺細君

甘渴者思

蘇軾詩曰歸來一點殘燈在猶有傳相遺細君

廿五

原詩梁徐陵詠甘詩曰朱實挺荆南苞品擅珍淑上林

雜嘉樹江浦間修竹萬里擬封家千株挺荆國綠葉萋

以布素榮芬且郁得陳終宴歡良垂雲雨育 增唐杜

甫詩曰岑寂雙柑樹婆娑一院香交柯低几杖垂實礙  
衣裳滿歲如松碧同時待菊黃幾回霜葉露垂月坐胡  
床 又曰春日晴江岸千柑二頃園青雲羞葉密白雪

避花繁結子隨邊使開筒近至尊後於桃李熟終得獻  
金門 柳宗元詩曰手種黃柑三百株春來新葉徧城  
隅方同楚客憐皇樹不學荊州利木奴幾歲花開間噴  
雪何人摘實見垂珠若教坐待成林後滋味還堪養老

夫 宋蘇軾詩曰侍史傳柑至帝傍人間草木盡天漿  
寄與維摩三十顆不知簷蔔是餘香 又曰一雙羅帕  
未分珍林下先嘗媿逐臣露葉霜枝翦寒碧金盤玉指  
破芳辛清泉漱漱先流齒香霧霏霏欲喫人座客殷勤  
為收子千奴一掬為吾貧

原賦晉胡濟黃甘賦曰惟江南之奇果資天地之正陽  
生殊方之妙域植朱島之遐鄉處漢之南背江之陰左  
協蘭皋右接桂林帶激水之清流向崇山之高岑三秋

迭運初寒履霜照耀原隰蔭映林荒若菱華之繡綺井

燭龍之銜金璫

劉瑾甘樹賦曰伊冥造之緜緜兮纏

羣象於成遇嗟卉草之森秀兮將歸美於甘樹誕寄生  
於南楚兮播萬里而東布浸冷泉以搖根兮竦逸條以  
承露結密葉以舒蔭兮滌纖塵以開素仰清氣以旭晨  
兮流惠颺於薄暮雖飛榮於園沼兮契密松之貞趣時  
屢遷而彌真兮凌寒暑而一度 宋謝惠連甘賦曰嘉  
寒園之麗木美獨有此貞芳質歲蕤而懷風性耿介而



凌霜擬夕霞以表色指朝景以齊圓侔萍實乎江介超  
玉果於崑山傾子節兮湘之區承君玩兮堂之隅濯雨  
兮冒霜長無絕兮芬敷

原贊晉王升之甘橘贊曰節重履險操貴有恒二樹保  
榮四運齊能在質為美於味斯弘異分南域北則枳橙  
原頌梁宗炳甘頌曰煌煌嘉實磊如景星南金其色隋  
珠其形

增表梁皇太子謝甘表曰甘踰石蜜味重金衣暉章縹

李豈止稱於晉世上林美棗非獨高於漢日 唐宰臣  
謝明皇賜甘表曰雨露所均混天區而齊被草木有性  
憑地氣以潛通故茲江外之珍果為禁中之佳實 唐  
劉禹錫謝甘子表曰甘踰萍實剖食既同於楚謠寒比  
蔗漿析醒何慙於漢使

原啓梁劉孝儀謝晉安王賜甘啓曰便得削彼金衣咽  
茲玉液甘踰萍實冷亞冰壺立消煩餽頓除酩酊近嗤  
齊相進不剖之實遠笑魏君逢裂牙之味 庾肩吾謝

湘東王賡甘啟曰傳名地里遠自武陵之洲族茂神經  
遙聞建春之嶺王逸為賦取對荔枝張衡制辭用連石  
蜜足使萍實非甜蒲萄猶餽

增傳宋蘇軾黃甘陸吉傳曰黃甘陸吉者楚之二高士  
也黃隱於泥山陸隱於蕭山楚王聞其名遣使召之陸  
吉先至賜爵左庶長洞庭君尊寵在羣臣右久之黃甘  
始來一見拜溫尹平陽侯班視令尹吉起隱士與甘齊  
名入朝久尊貴用事一旦甘位居上心銜之羣臣皆疑

之會秦遣蘇軫鍾離意使楚召燕章華臺羣臣皆與甘

坐上坐吉咈然謂之曰請與子論事甘曰唯唯吉曰齊

楚約西擊秦吾引兵踰關身犯霜露與枳棘最下者同

甘苦率家奴千人戰季洲之上拓地至漢南而歸子功

孰與甘曰不如也曰神農氏之有天下也吾剝膚剖肝

怡顏下氣以固蒂之術獻上主喜之命注記官陶弘景

狀其方畧以付國史出為九江守宣上德澤使童兒亦

懷之子才孰與甘曰不如也吉曰是二者皆居吾下而

位居上何也甘徐應曰君何見之晚也每歲太守勸駕  
乘傳入金門上玉堂與虞荔申枵梅福棗嵩之徒列侍  
上前使數子者口悞舌縮不復上齒牙間當此之時屬  
之於子乎屬之於我乎吉默然良久曰屬之於子矣甘  
曰此吾之所以居子之上也於是羣臣皆伏歲終吉以  
疾免更封甘子為穰侯吉之子為下邳侯穰侯遂廢不  
顯下邳以美湯藥官至陳州治中


增雜文韓彥直真相錄曰柑別種有八橘別種為十四

橙別種為五凡其類合二十有七而乳柑為第一故溫人謂乳柑為真柑謂他皆若假設者而獨真柑為柑爾且溫數邑俱種柑而出泥山者尤傑然推第一予北人安得所謂泥山者而啗之又故事太守者不得出城從遠遊無因領客入泥山香林中泛酒其下而客乃遺予泥山柑因為之譜 明劉基賣柑者言曰杭有賣果者善藏柑涉寒暑不潰玉質而金色置於市價十倍人爭鬻之予買得其一剖之如有煙撲口鼻視其中則乾若

敗絮予怪而問之曰若所市於人者將以實乾豆奉祭祀供賓客乎將銜外以惑愚瞽也甚矣哉為欺也賣者笑曰吾業是有年矣吾業賴是以食吾軀吾售之人取之未嘗有言而獨不足子所乎世之為欺者不寡矣而獨我也乎吾子未之思也今夫佩虎符坐皐比者洸洸乎干城之具也果能授孫吳之畧耶峨大冠拖長紳者昂昂乎廟堂之器也果能建伊臯之業耶盜起而不知禦民困而不知救吏姦而不知禁法壞而不知理坐縻

廩粟而不知恥觀其坐高堂騎大馬醉醇醴而飫肥鮮  
者孰不巍巍乎可畏赫赫乎可象也又何往而不金玉  
其外敗絮其中也哉今子是之不察而以察吾柑予默  
然無以應退而思其言類東方生滑稽之流豈其憤世  
疾邪者耶而託於柑以諷耶





御定淵鑑類函卷四百